

Intro e stria:
Agordin, agordin
veci, doven e bocin!
Ma cuant bel elo esse tornada?
Pronta pronta a la fiamada!
Ma che bei che sié e come steo?
Cuante vece aon brusà, ma ve penseo?
Me toca dì che co ven sto moment
spere semper che sofie l vent
che almanco l foch ciapa meio
e l me sgueltis sto gran degheio!
Oì che sgriz che me vien sto an
pensee de avé catà l modo de me schivà i
malan!
Ades ve fae vede mi mi:
“Abracadabra
bibidi bu
foch e fiadigole
non vengono più!”
“Ipsi dipsi cacci dupsì
Cater e cater set,
Maria manca n pit
voi sù che vardé fit!”
Fursi saré drio a ve domandà che che la
vecia la s’è beest
ala fat su che po per perde l sest?
Oramai me cognossé, che me pias fa le
robe en grant
se avé passienza ve la spieghe, no ghe
meton gnanca tant!
Engeri l alter son stada inte a l’erboristeria
en contrada
che me ocorea calche erba nte armer
ma me sa che son stada n cin esagerada
e ades son fenida come a Scarborough
Fair!
M’è vegnest na passion per le formule de
magia
e tut de bot me sente come fusse na stria!
Fin a n cin de temp fa disee su litanie
ades me gode de pi co le stregonerie!
Fae anca pozioi a la Frankenstein Junior
e ve liede l testament con n cin de humor!
Zata de notola
Ale de osel
Ocio de gnu
Bibidi bobidi bu!
Frasche da Veran

crodoi da Digoman
scarponaz de taiboner
fursi l é meio se torne al teler!
Po se sa, almanco cossita me perde n cin
via
e me par che la fiamma la sie manco ria!
Ma ensoma basta descòre de robe
personai
che mi sè ben che che volé da mi
che ghe la cante a chi cuater gai
che ghen combina una ogni dì!
E allora tacon co sta manfrina,
ma ve vise, me sa che sto an se no volé
ghe restà mal, ocor ciapà na spirulina!

Covid:
Oiotomissi,
ma dassen elo passà n alter an?
Ades mo, no me recorde gnanca pi come
doprà la mascarela,
la ciape da n vers, la gire de revers,
gnanca fusse na barela!
Ma ensoma dai, oramai podon dì che l
COVIT l è ciapà la pi curta
ma no l é che la situazion la sie manco
burta
Se me pense come che arion redusesti
doi ani fa
che no i ne assea gnanca ndà al
supermercà
e ne à tocà fa l testament en SMART
WORKI dal Mirko
ah tosat, là sù che l era stat n bel zirco!

Radio più:
A proposito del Mirko, olone propio tacà
col bot?
Alora tiré fora vuvuzela e subiot
perché che sè che a dilo fa da strani
ma RadioPiù chest an la compis 40 ani!
Ma ve penso che magon se no la fusse
mai stada?
Tuta la dent che la s’è dat da fa,
con passion e bona volontà
ogni dì con valch de nof e nove pontade
programi, musica e viabilità su la strade!
Ca da n cin, i à tacà fin, co le Nove per
Ladin!

Dai dai, disonlo fora dret, l é poch da fa
RadioPiù l é la os del Agordin!
E donca auguri, a mile de sti dì
speron de podé scoltà semper de pi!

Beatificazion Papa Luciani:
E per seguità co le robe bone
descoron de n pèr de altre notizione:
i à beatificà l papa Luciani
ghe à olest boni doi ani.
Col vescof Savio, 18 ani adrio, tut l era
tacà
e fin ai de 4 de setembre sta storia la à
durà.
La nova emportanta de la so Beatificazion
inte l nos Agordin la à portà na granda
agitazion
PENSAION fin che rivese el papa
co la tiara nte la crapa!
Chesta aria nova la n' à portà na gran
legreza:
me son sentesta
come na balineta senza tuti sti ani su la
cresta.
A Buenos Aires al miracol i à osà
e a Roma i lo à azetà!
Dal agordin n grum de dent la é ndata in
dò
siben che l temp l fusesse sul boh boh
Se me pense sì, de el anca mi è n bel
ricordo
co l era capelan de Agort tuti i ndea
d'acordo
L era n bel dovenot, semper su chel de
studia
s' à vist i resultai e chel che l é diventà!
Penseve che inte l '78 in Agort l é rivà da
patriarca
e doi mes daspò l é saltà su la barca
che per solche trenta dì per mar la à
sgorlà
ma per semper l so segn la à assà!
La so beatificazion l é propio n event
che segnarà la storia del Agordin e la so
dent.
Doven per na olta scolté sta veciapopa
ciapé en esempio da el, l'umiltà no la é
mai poca.

Speron che sto tant l dae ancora pi luster
a la nosa val
che la é bela come l sol da Agort a Canal!

Preti/clero:
E enveze dei preti olone dì che?
Ormai sta spartizion la à n so perché!
Se in Agort ghen aon doi da spartisse in
trei
su per l Poi ghen é un che fa assei!
Ma d'altronde i temp i MUDA
e la vocazion no la é pi de MODA
semper manco previ
e semper pi credi
e se da Roma propio no i mola
son drio a perde anca mi la linzola!
A vegni in dò da la Val de Frela
son caiesta e me s' à vert fin na scarsela
e sì ADIOS al me rosario
l è perdest cua fora dal concessionario!

Guera:
Mare mea sì, bocin, bodat, pupi e corvat
ades vegnon a n alter tafat!
Manco mal che ormai son vecia
e no ghe sente da na recia,
è anca n ocio che sbarlucea
e no me fae pi nissuna marevea.
Perché se no, dassen,
no podarae sta nia no in ben!
Daspes sente che fin che en Italia se fa l
Festival
vol dì che no la va po cossita mal!
Sarà, ma mi è pensier
avé capì sì, de la guera, via de là
no me par che la sie longa
che la rive anca de cua!!
l me spasemea tuti doi, vel die scét:
Chel un da la "giacheta verda" e anca chel
che "vien dal fret".
De "geopolitica" e de "economia"
no capisse propio nia,
e sarae da assà
che i sbereghee chei che sa
ma no se pol gnanca sta solche a vardà!
Sione tuti fora col zucot?
Olone saltà tuti per aria con n gran bot?
Chi là, co i se insurienta,

no i te fa solche fignot!
Chi là, se la ghe fuma,
i tira fora alter che l scòp!

Aumento prezzi:

Perdepi con chela de la guera finaron a fa
la fam

i prezi i lievitea pi de la me crostada de
nosele

e no solche del gasolio ma anca del
legnam

e fursi tra n cin anca de le matonele!

Mah, mi me sa che l é calchiduni che fa l
furbet

che se aon i pez che ne riva fin inte nte let
sarà che mi son n cin embacucada

ma spieghéme, ela onde la incula...?

Ehm ehm...

Me la moche, valà che l é meio,
ma mi me recorde l an passà co la é
tacada

ades l é pi de n an e l é solche empirada!

Chi dai giornai no i ghen descor gnanca pi

ma mi no no me desmenteghe e fae n
rosare ogni dì!

E dighe su orazioi anca per chela pore
dent de Siria e Turchia

che i à sfrugnà su e dò na vita e i à
perdest tut come nia!

Noi saon ben che che vol dì co la tera la
taca a sgorlà

che del Friul e de L'Aquila no s'aon
desmentegà!

Ma ve die Agordin, no l é da se butà dò
gnanca davant a sti grant dan

e esse bon de dividide anca na fregola
de pan

che l terremoto l sgorla e l fa tom tom
ma i mal pedo i vien dal om!

Furti e droga:

N'altra da contà l é dessegur chela dei
furti,

ades la not me vien schegot de chi musi
burti,

chel che i à proà a fa inte a la Vila Fiore
no podea esse alter che opera de cuater
pore!

l avee visti anca mi da la fenestra
entant che cusinee fave e menestra
Alora è proà a zigà "al ladro al ladro!"
ma chi poregram, col sistema de sicureza
dei Dotta, no i s'è portà via gnanca n
quadro!

Me sa che Agort l é drio a diventà pedo
de Niu Yorch

alter sì de cande che l era solche camp de
sorch.

Orco e po fora! Ma saralo mai robe che i
ebe catà ancora siringhe nte piazza?

Chi là i sfraza, con gusele e alter tafat
ma co l tramtram l é fat, l é fat!

La olta bona che n pupo ghe baleghea
sora?

Me vien propio da mandave tuti en
malora!

Zerto, l é valch de trist, ma mi i l è belche
dit l an passà,

che la colpa no la é solche de lori

ma anca de chi che avarae da aidà!

Vardonse ben dintorn, che l disagio no l é
che in Agort no l sie

e le siringhe no le sparì se le scondon sot
al pie!

Aministrazion:

Ma voi savé che la me granda passion

l é faghe i cont a chi da l'aministrazion

ghen é semper da contà peste e corn

donca pareceve e tiré fora i popcorn!

Pronto? Pronto? Se pollo descòre co l
uficio tecnico?

Ah, l tecnico no l é da doi mes? Elo ndat a
pescà pes?

Me scuse, ma co le prateghe ferme ades
fone che?

Le doprone come fazolet co se beon l
caffè?

l tentacoi de la burocrazia sessaben i é
pericolos

ma che la piovra la se sconde l é propio
vergognos!

Mi me la ride ma fursi l é da piande

se caton l responsabile el tacon per le
mudande!

Pont nof Taibon:

E con chel pont nof inte a Taibon? Se
dezideli a vèrde?
Mi me savarae bel vedelo col semaforo
verde
enveze i m'à contà che la dent la riva tuta
convinta co la bici o de corsa
e sicome che no l é ancora síà
i se buta ntel Cordegol per passà!!
I laori i era tacai ancora de Agost tardif
sì sì, i se la merita propio na tirada de
recia
m'à vegnest anca n'idea per sto collaudo
alternatif
menéme fin là inte che ghe fon passà la
vecia!

Viabilità e zentro storico:

N'altra che chi da la politica i s'à inventà
l é i dissuasor de velocità
che i va benon per carità, sì sì
ma enveze n cin de lum se pol la
mancegni?
Mi la not no vae gnanca pi n giro, l é
massa scur
co la machina se risčia de fenì su per n
mur
o ancora pedo magari inte n fos
che i cen i lampioi stusai anca ai incros!
E po l é pien de bestie e animai rari
zerf, caurioi e lupi mannari
per l comun par che sie assei con doi
segnai luminos
ma mi me sa che l é ancora pericolos!
Signor sì, vardon mo de doprà i schei
onde che ocor
che mi co vede ste robe me ven n brusor!!
Aboncont, me die che l é anca colpa de la
dent
che i ciacolea de tut chel che i sent.
Ades i se cruzia del nof distributor de la
farmazia
che l é burt da vede e no serf a nia
ma preferio che i doven no i pode tirà fora
doi goldoi
o tut chel che ocor nte CHELE ocasioi?
Che po tosat, volone descore del zentro
storico n cin?

Me sa che la cuestion la é gestida a stim
che la contrada, assemelo dì, la sarae n
gioielin
e no sion boni gnanca de mete fora n
fiorelin!
E entant che le vai apede le spenz sul
turismo
noi ndon avant solche co l
associazionismo!

La pista ciclabile:

Ma saralo mai possibile
che con tut sto progres
sione ancora come i pes?
Aon l'aiva a la gola con chela de la
ciclabile
che daspò de tut sto temp la é ancora
impraticabile
per n forest se à blocà la pista entiera
no la me par na nova tant lediera!
Pi de 10 milioi de euro la à costà
per zercà de esse al passo con chi de là
e penseve che la avea da rivà da Burban
fin su en Fodom
ma la s'à fermà belche in Agort e a
Taibon.
Per colpa de la burocrazia o dei forest
a ndà en avant par che ghe vobe n gran
zest
e co ben i laori i é tornai a seguità
a Taibon l pont i s'à sbaià a mesurà!
E come se no bastesse ai Castei na frana
la é tomada
e i laori a la galeria i é ndati dò per la
scarpada!
Penseve ben che la pista la sarà fursi pi
curta de tuta sta berta
ma la farà ben 67 km e mez con calche
gerta!
Per st'an che vien la dovarae esse fenida
spere de no catame ancora co sta sciona
desavida
e che i se move anca co la galeria
se no olon fenì sot come in Turchia!!!

Luxottica parcheggi:
Tanti i se lamenta come mi del pi e del
manco

anca en Valcozzena i parcheggi i à costà
pi de n franco!
Strada nova e anca na rotonda,
doi semafori, co l é le 5 tuta na baraonda.
l à metest anca l barachin per contà su i
pali
vardé che oramai par cuasi la Silicon Vali!
Ma chest no l à bastà
la vigilessa multe la ghen continua a fà.
Ela la fa el so mestier
co la scrif, no la va sul ledier.

Ma ensoma i à poben fat anca valch de
bon
sti cuater bacan de l'aministrazion
che anter trine e cheganif
toca dî anca del positif!

Rifatto il tetto all'asilo nido:
Calche dî fa ere dò per la Rova a fa doi
barch
me gode a ndà a stroz en lonch e en larch
e che sorpresa co è vist l nof cuert del
asilo
i lo à propio regonà a filo
cossita sî che i bocie i sarà content
e anca tute chele brave maestre che toca
dî che le é propio n portent!

Ecocentro:
E po chela del ecocentro la é ndata a bon
fin
l é vera, gh'à olest n cin
ma se ve fé n giro inte per Valcozena a
butà scuaze
ve rendaré cont de come che i gh'à
cambià le straze!
Perché che se sa che aldidencoi se
descor de cuà e de là
de fa così e colà
ma ogni tant sta sostenibilità
l é propio difizile da catà!
Che emportant tosàt che l é oleghe ben a
la nossà tera!
Ogni tant la traton come fusse na
prisionera de guera
ma no se nascordon che se sen ciavon de
tut

sion noi i prim a fa kaput!!

La Toresella:
Oh e mancomal che i à comedà la
Toresela,
che bel sî, co ere dovena là inte ndee a fa
la monela.
Cuanti bei ricordi de la me gioventù
me soven de n bel tosàt che me pare l me
avea imprometù
che LATINLOVER, o fursi no, me die che
son drio a fa confusion
ben ben, che la reste en pie ncora tanti
ani, speron!
Sì, i laori i é stai n cin longheti
ma ades no no la cascarà pi dò a toch
l é part de la storia del nos loch!

E sî aon scuasi fenì, popi bei
Se me soporté encora n toch po men vae
a sgolà coi osei.
Voi fenì col recordà doi grant Agordini che
sto an i ne à assà
ma con chela de dî ACE, no per se cruzià!

Del Vecchio:
L prim dei doi, l savaré, l é l nost
Leonardo.
Sta burta notizia che de bot la é rivada
tuti la ne à lassa de stuch inte la valada.
Inte n dî de inizio istà,
con grant despiazer l cavalier l ne à assà.
Cuanta tristezza e magon,
per chest brao om
che tant l à fat per tuti cuanti,
vesin e distanti.
Penseve cuanta dent che lo à spetà,
cande che la piazza l à traversà
perché che in Agort l volea TANT tornà.
E ve recordeo cuanta dent che l à olest
saludalo,
tut al dî e tuta not i ndea a catalo.
Al palaluxottica tuti auna con dolor,
da Milan a Parigi a l'Australia,
ma tuti vesin a la soa fameia col cor.
Veci amighi, coleghi, operai e dent del
loch,
l à olest rendeghe onor con chel poch.

I 30 de dugno pareva che anca I ziel de
Agort I volesse cavasse i afan
torchin come solche inte zerte dornade del
an!

Mi m'è liet I liber tut de bot
ma vardé che I é dassen na storia da Mile
e Una Not!

Son segura che tuti voi che ndé a laorà
nte la LUSSOTICA
da ades la vardaré con n'altra otica
e anca tuti noi che ghe vardon ogni dì dal
Broi
oramai la é e la restarà na part de noi.
Aon bisogn de sognà ogni tant
e Leonardo I n'à fat vede come che a parti
dal nia se pol diventà davera grant!

Renzo Gavaz:

E se col Del Vecchio no s'aon cognossest
personalmente

voi recordà con voi n'altra granda mente
che I à fat tant per chesta manifestazion
con passienza, legrezza e tanta passion!
L Gavaz I é stat per tanti sindaco, colega,
ma soratut amigo

I se n'à inventade tante e no I à mai fat I
figo!

Chi là i era i ani che I Broi I se empienta de
maschere e car

ogni an ghen era una e calche nof afar!
El I era n om de grande spirito anca co se
ghe tirea le rece

che sora I comun ghen aon tirade entiere
sece!

Ma el nte chel dì I era semper cua dintorn
e no I se I à mai ciapada
e per quant che se ghe disesse pest e
corn

I era semper pronto a se fa na ridada!
Bon viaz Renzo e tut I bon
ades che i me brusa segur se vedaron!

Auguri finai e congedo:

E con chesta me die che aon spordest n
pensier a tuti

grant, picioi, bei e burti!

L é stat bel anca sto an

è scrit I testament tut drioman.

Oramai son usada, no solche a fum e
fiameroi ros e dai
ma anca a carta, pena e calamai!
Voi tornà a dì mili ACE a chi om e femene
valent

che ogni an i met su sto ambaradam e
supersora encora i se le sent!

No sté a molà, che no I é nia de mal
I é valch che renz ugnola la nossa bela
val!

Ben po, ades che de liede è fenì
bon an a tuti e che sie festa ogni dì!

E sicome che no me sovien pi nia
deme foch come na vera stria!

Mi da la me banda ve mande n bel
sortilegio

che I ve sbachete come en colegio!

Abracadabra alakazam

foch e grigliate me empientis de fam
e bibidi bobidi, ma bubu dassen

la vecia la se sgorde al an che vien!